

本朝分省人物考

人物考卷之五十二目錄

浙江金華府

宋濂

王禕

呂文燧

徐原

諸葛伯衡

許存仁

朱廉

傅藻

朱文

張孟兼

葉儀

范祖幹

馬廉

廉懷德

李暉

蘇友龍

鄭淵

吳沉

鄭濂

鄭濟

鄭沂

鄭湜

鄭棠

鄭楷

李希明

何士英

吳履

劉辰

張壽祖

胡翰

汪仁壽

江與立

盛本源

何壽朋

董仁仲

朱肇

楊芾

樓璉

王紳

金信 附子聲

鄭栢

鄭欽

龔泰

戴元禮

貝泰

邢旭

邵玘

謝忱

陳俊

包珣

盧睿

章聰

王稔

李敘

杜桓

馮傑

潘璋

樓澤

宗祉

姜璉

龔永吉

目錄終

本朝分省人物考卷之五十二

浙江金華府

宋濂

宋濂字景濂金華縣人在姪七月卽生爲嬰兒時苦  
多病每風眩輒昏迷數日年六歲入小學授以李瀚  
蒙求一日而盡自後日記二千言同肄業者日暮罷  
歸其所讀皆成誦九歲爲詩歌有奇語人呼爲神童  
年十五六里人張繼之邀至別墅問以四書經傳若  
干日可通背以一月爲答初不之信抽架上雜書俾  
卽記五百言乃以指爪逐行按之按畢輒背一字不

遺繼之告其父尚書公曰是子天分非凡當令從名師其父乃携入城府受業於聞人夢吉受以春秋三傳之學凡學春秋者皆苦其歲月先後難記濂卽列國紀年能悉誦之但舉經中一事卽知爲魯公幾年幾月是年實當列國某君幾年幾月或俾書覆之無少異者且兼通易書詩及周禮諸經爲舉子業每出諸生右會吳貞文公萊授經於白麟溪上攻古文辭濂欣然往從學之未幾悉得其間奧自是文章之名籍然著聞矣居無幾何吳公解館而歸濂嗣主教席子弟相從讀書講道東明山中時柳文肅公貫黃文

獻公潛皆大儒禮以友道柳公曰吾邦文獻浙東號  
爲極盛吾老矣不足負荷此事後來繼者所望景濂  
以絕倫之識而濟以精博之學進之不止駕風帆於  
大江中孰能禦之黃公曰吾鄉得景濂斯文不乏人  
矣至正己丑用大臣薦擢將仕郎翰林國史院編修  
官以親老不敢遠違固辭會世亂益韜晦不事表顯  
乃與弟子入龍門山著書二十四篇龍門凝道記及  
著孝經新說周禮集註等書濂於天下之書無不讀  
而析理精微百氏之說悉得其旨要至於佛老之學  
亦所研究用其義趣裁爲經論誠意伯劉君基謂其



主聖經而奴百氏馳驅之餘取佛老語以資戲劇譬猶飫梁肉而茹茶飲茗耳歲乙亥冬高皇帝定鼎金陵遣使者樊觀奉書幣造門徵之濂遂幡然應詔與青田劉基麗水葉琛龍泉章溢俱見上尊重之建禮賢館以居語必稱先生而不名七月命為江南等處儒學提舉陳友諒平乃撰平江漢頌上大錄賞十月奉旨入內授皇太子經遇綱常大義明白開陳再三言之而不倦上深嘉歎之壬寅八月上召濂及興國孔克仁講春秋左氏傳畢濂起曰春秋乃孔子褒善貶惡之書苟能遵行則賞罰適中天下

可定也是月告歸省親有白金文綺之賜甲辰十月  
改起居注濂侍 上左右知無不言補益甚衆明年  
乙巳正月 上御端門與論及黃石公三略且曰釋  
之濂進曰尚書二典三謨帝王大經大法靡不畢具  
願 陛下畱意講明之 上曰朕非不知典謨爲治  
之道但三略乃用兵攻取時務所先耳 上召丞相  
李善長歸江西軍中所掠牛與其民無牛者勿取其  
租丞相退 上顧濂曰向所言事當乎對曰民富則  
君不至獨貧民貧則君何能獨富捐利於民實興邦  
之要道也三月臥疾 上曰老宋起居何久不見繼

聞在告乃憂形於色謂侍臣曰爾往傳命俾歸金華山父子祖孫懽然同聚疾必速愈且速造朝乃賜金帛 皇太子致贈有加焉六月上箋謝恩復奉書皇太子勉以孝友恭敬勤敏讀書毋怠情毋驕縱修進德業以副天下之望 上覽書喜甚 上每與羣臣言其淳謹君子輔導有方眷遇甚隆吳元年二月設三局一曰律局二曰禮局三曰誥局徵儒士徐大章梁寅分寘各局以濂等領之既而丁尚書公憂服除詔修元史爲總裁官兼修禮書六月除翰林學士亞中大夫知制誥兼修國史三年二月 上御東閣

濂等進講大學至有土有人反覆陳說 上加納之  
七月元史成賜金幣有差其筆削倣春秋末著順帝  
不綱風憲皆爲不捕之猫將帥盡成反噬之犬由是  
羣雄角逐九域瓜分人以爲至論時甘露屢降濂撰  
頌 上問災祥之故對曰受命不於天於其人休符  
不於祥於其仁是以春秋不書祥而紀異爲是故也  
皇上畱神至治以得仁賢爲瑞以臻和豐爲祥視前  
代植金莖以承液誇嘉瑞以紀年者不侔矣 上姪  
文正以荒淫擅殺得罪濂曰文正罪固當死 陛下  
體親親之義生之而置諸遠地則善矣 上嘗言古

之帝王當宴安之餘多好神仙以朕言之使國治民  
安心神怡康卽神仙也對曰漢武好神仙而方士至  
梁武好佛而異僧集皆由人主篤好故能致之使移  
此心以求賢輔天下其有不治乎 上深然之 上  
嘗祀方丘患心不寧濂進曰孟軻有言養心莫善於  
寡欲審能行之心清而身泰矣 上稱善久之後失  
朝左遷編修十二月遷奉議大夫國子司業國子多  
大臣子弟蒞之以莊率之以正日進諸生立兩序據  
坐執經敷揚闡奧之旨教以孝悌忠信之道學者帖  
帖遵度四年七月坐考祭禮遲滯與魏觀同謫濂授

安遠知縣五年二月召爲禮部主事六月嘉瓜生於  
句容 太祖命濂撰嘉瓜贊濂之忠誠久而彌篤

皇太子一言一動皆以禮法諷諭使歸於道讀書至  
切於政教及前世興亡之故必拱手揚言曰君國子  
民之道當如是不當如彼且推人情物理以明其義  
皇太子每斂容嘉納 上嘗問帝王之學何書最要  
濂請 上讀真德秀大學衍義 上覽而悅之令左  
右大書揭之兩廡之壁時諦觀之六年正月以舉人  
張唯等爲編修入文華堂肄業命濂爲之師 上聽  
政之暇幸堂中評文優劣每食太子親王迭爲之主

上御西廡大臣皆侍坐 上指衍義中言司馬遷論黃老事令講析俾在坐者聽之濂旣如詔復言曰漢武嗜神仙之學好四夷之功民力旣竭重刑罰以震服之臣以爲人主能以義理養性則邪說不能侵興學校教民則禍亂無從作矣刑罰非所先也 上謂濂曰朕之爲君上畏天下畏兆民兢兢業業不敢自逸對曰 陛下此心古先哲王之心也願 陛下慎終如始 上御齋室濂侍坐 上問三代之曆數封疆之修短廣狹濂歷言之且曰三代之治天下也以仁義故歷年多後世莫及 上嘉納七月陞翰林侍

講學士中順大夫知制誥同修國史仍兼贊善大夫  
奉詔搜萃歷代姦臣之蹟編爲辨姦錄及進太子諸  
王各分賜焉初 上作祖訓錄至是書成命作序論  
以大意濂歷言帝王之道及 皇上創業之艱以致  
箴戒之意於後人 上稱善命刻於篇首嘗侍 上  
至後苑觀穫 上曰農事成矣對曰國以民爲本民  
以食爲天 陛下知稼穡之艱難而念生民之勞苦  
實盛德也 上問曰三代以上所讀何書對曰上古  
載籍未立不專讀誦而尚躬行人君兼治教之責躬  
行以率之天下有不從教化者乎八月奉旨纂修大



明日曆一百卷擇言行之大者爲寶訓五卷總裁其事朝夕禁中至七年五月乃成十一月孝慈錄成八年正月 上與濂論用人 上曰人材不可一槩而論 負能之士或有隱於老佛卜筮負販者顧在上者能拔用耳否則有志不得上達多矣濂對曰誠如

聖諭三月洪武正韻及大明律成俱爲總裁九月侍皇太子親王遊中都隨處規益旣歸 上諭曰皇太子畱心治道卿等居常諷諭庶廣識見幸善調護之濂自以布衣沐非常之遇誓竭誠以報國凡 上有所任使靡晝靡夜躬閱載冊書於牘進之或覆視於

辨一字不遺在朝日久若郊社宗廟山川百神之典  
朝享宴慶禮樂律曆衣冠之制四夷朝貢賞賚之儀  
及勳臣名卿焯德耀功之碑承 上旨意論次紀述  
咸可傳於後世在 上前所陳說不爲文飾隱蔽雖  
家事苟有問亦一一道之常曰君猶父也天也其可  
欺耶故 上久而益信其誠欲俾叅大政辭曰臣少  
無他長惟文墨是攻今幸待罪禁林 陛下之恩大  
矣臣誠不願居職任也 上愈厚之每宴見必命茶  
賜坐每旦令侍膳詢訪舊章講求治道或至夜分乃  
退屢有所建明召問廷臣臧否第言其善者不置又

問否者爲誰濂曰善者與臣友故知之否者縱有臣不知也卒無所毀或命賦詩爲文必寓忠告嘗奉制詠鷹令七舉足卽成有自古戒禽荒之言上欣然曰卿可爲善諫矣然濂絕不以譖入至於應制之作亦不畱藁署溫樹二字於屋室之壁有問及內事者指以示之上嘗與濂飲素不勝杯勺舉觴卽辭

上強之至三觴面如赭行不成步上觀笑親御翰

墨賦楚辭一章以賜仍命侍臣咸賦醉學士歌且曰俾後世知朕君臣同樂若此也甘露降上召賜坐

上躬執金杓煉湯於鼎以甘露投之手注於卮以賜

濂曰此和氣所凝能愈疾延壽故與卿共之耳皆異恩也九年四月將有事於方丘適有晉王妃之喪命濂考古制以聞對曰按王制喪三年不祭惟祭天地社稷越紼而行事喪服傳云宮中有喪三月不舉祭既葬而祭宋王珪司馬光王安石皆以爲祭天郊社之禮國之大事聖人所重雖有三年之喪亦不敢廢示有尊也 上然之五月 上謂濂曰自古有國家者未有不資賢才而能燭理秦之時張良陳平韓信皆隱屠釣漢高用以成帝業今山林巖穴豈無超羣拔衆之才茲欲羅致之其道何由濂曰取士莫善於

鄉舉里選用人莫善於因能任官任官莫善於久居  
不遷古有是論而 陛下行之得才之效莫過是矣  
六月 上以濂久典制作宣勞爲多特拜翰林學士  
承旨知制誥兼修國史 上每 朕以布衣爲  
天子卿亦起草萊列侍從爲開國文臣之首俾世世  
與國同休不亦美乎趣令取子孫官之屢辭謝不敢  
奉詔至是詔徵冢子瓚之子慎爲殿廷儀禮司序班  
未幾復召介子璩除中書舍人 上時休暇輒命題  
試璩與慎而戒飭之 上笑語濂曰朕爲卿教子孫  
濂或奏事久稱倦 上命璩慎共扶下殿祖子孫三

世皆官內廷當世以爲異事復以艱於行步特詔  
皇太子選良馬以賜 上親作良馬歌復詔羣臣咸  
作之以寵耀焉濂益感激不自寧 上以濂年且至  
不可煩以事十一月有致政之詔加贈其父爲嘉議  
大夫禮部尚書誥辭皆 上所親製天下榮之濂行  
既有期 上眷念尤深曰卿去何時復來見朕乎幸  
相待數日姑徐徐行由是朝夕左右者累月時詔許  
言事朝臣有 上疏萬餘言者 上厭其迂愆怒欲  
罪之以問羣臣有阿意者指其疏曰此不敬此詆謗  
罪當誅 上舍之而罷怒未解召濂對曰彼應詔上

疏其心爲國耳烏可深罪乎 上默然已而 上覽  
疏中有足采者召阿意者罵曰吾怒時若等不能諫  
乃激吾誅之何異以膏沃火向非宋景濂之言幾不  
誤罪言者耶 上嘗廷譽濂曰古之人太上爲聖其  
次爲君子若宋景濂者事朕十有九年而未嘗有一  
言之僞誚一人之短寵辱不驚始終無異其誠所謂  
君子人乎十年二月濂辭歸瀕行賜金幣文綺及  
御製文集皇太子贈以衣三襲 上又問卿今年幾  
何矣濂曰六十有八 上曰藏此綺俟三十二年後  
作百歲衣也濂叩首謝 上復囑曰大江漲不可舟

卿宜循內河達家庶幾無虞仍俾慎護行至家卽拜  
表遣慎詣闕稱謝仍上箋皇太子申明正心治國之  
要 上賜詔褒答初將辭請歲一來朝是年九月朔  
遂入朝越十四日見於端門 上佇想已久廷問累  
矣及見大喜加勞再三皇太子諸王皆驩動顏色越  
朔日 上降勅符遣儀曹奉醪膳諸物抵寓館以賜  
自是日侍 上遊歷觀宮闕盤旋禁禦詢諮備至便  
殿侍食日晏始退恩禮之優羣臣莫敢望寺人衛卒  
見其至皆以手加額相推排迎拜恐不得先覩之畱  
朝七旬餘 上重其還而難言之濂以歲暮力辭還



復遣中貴人賜上尊至於道所經行皆上爲指畫  
旣行數日上問璩曰爾父道中無恙否璩以安對  
未幾復謂璩曰朕疇昔之夜夢見爾父笑談如曩時  
爾父雖去其容儀儼然在朕目中也璩叩首謝曰非  
陛下垂念臣父之至何以形諸夢寐濂德重而不居  
位顯而彌恭旣司制作之柄造門求文之士先後相  
繼蠻夷朝貢者數問其安否日本高麗安南使者至  
購文集不啻拱璧而濂退然自持似不能言者朝廷  
有大議閭閻引古今辨說不少有所回性命之理晚  
而益究其極外物之往來視之若不相干嘗曰古人

之爲學使心正身脩措之行事俯仰無愧而已繁辭  
複說道之敝也故作事不尚表暴務合乎義教人皆  
隨其質而導之使人於善與人交和易任真無鈞距  
爲所紿亦弗與較臨財廉非其分不取大書於門曰  
寧可忍饑而死不可苟利而生權要及有力者苟非  
其人雖置金滿橐求一字不肯與縱不得已與之亦  
不受其餽謝日本使奉勅請文以百金爲獻卻不受  
上以問之對曰天朝侍從之官而受小夷金非所以  
崇國體也 上深然之貧賤人情有可哀欲發潛振  
幽卽忻然爲之四持文衡試天下士得人爲多接引

後學惟恐弗及天下之能文者多經指授朝廷英俊咸以爲法雖以貴顯平居布衣蔬食無異貧士不事生產不置田宅或勸爲子孫計則曰富貴豈一家物哉自少至老未嘗一時去書不觀及致政歸青蘿山關一室曰靜軒終日閉戶纂述人不見其面戒子孫毋至城市姻婭有以郡縣事爲託者皆峻謝之或談及時事輒引去不與語切於仁愛聞民有困乏者食爲之不飽濂視近甚明夜置燈於几臥絺帷中能閱蠅頭小書一黍上能作十餘字皆可辨畫不飲酒寡嗜欲所著文有潛溪集四十卷蘿山集五卷龍門子

三卷浦陽人物記二卷已傳於學者翰苑集四十卷  
芝園集歸田以後所著計四十卷十三年冬孫慎以  
罪被刑舉家當寘重辟上念舊臣特赦安置茂州  
十四年五月卒于夔府年七十二

王 禕

王禕字子充義烏人自幼秀爽奇敏及長長身嶽立  
屹有偉度習古學師事真潛戊子元政亂禕爲書數  
千言上時宰危素張起石並薦不報隱青岩山著書  
戊戌徵署中書省掾商略幾務上每稱子充不名  
間與論文章稱善因命采故實爲四言詩授太子辛

丑進平江西頌 上覽頌喜曰吾固知浙東有二儒  
卿與宋濂耳學問之博卿不如濂才思之雄濂不如  
卿癸卯授江西儒學提舉司校理外艱乙巳除侍禮  
郎兼引進使定議禮制遷起居注丙午升同知南昌  
府祿被榛莽建府署撫瘡殘集徙散收廩賢士搜除  
奸蠹經理廢壞郡得安輯賜黃金帶丁未召議卽位  
禮忤旨洪武元年降漳州府通判尋上疏言上天以  
生物爲心雷霆霜雪有時而搏擊有時而肅殺然皆  
暫而不常向使雷霆霜雪無時不有則上天生物之  
心息矣洪武二年召修元史爲總裁官徵逸士汪克

寬胡翰宋儋陶凱等十六人爲纂修官開局天界寺  
禕史事擅長裁煩剔穢力任筆削書成拜翰林待制  
同知制誥兼國史院編修官三年預教大本堂經明  
理達善開導召對殿廷必賜坐從容宴語未久奉使  
土番尋召還五年往諭雲南六月至諭梁王亟宜奉  
版圖歸職方不然天討旦夕且至梁王不聽館別室  
數日又諭曰朝廷以雲南百萬生聚不欲殲于鋒刃  
曾不聞元綱解紐天兵西征不五六年天下大定爾  
恃險遠旅拒明命龍驤鷁艦會戰昆明悔無及矣梁  
王駭服有降意卽爲改館會元遣使脫脫至雲南覘

梁王有二心欲迫殺我使以固其意梁王持兩可不决匿禕於民間脫脫聞之誚梁王不得已出與脫脫相見脫脫欲屈之罵曰天訖汝元命我朝實代之汝如燭火餘燼尚欲與日月爭光耶我將命遠來豈爲汝屈有死而已顧梁王曰汝朝殺我大兵旦夕至六年十二月竟被害瘞地藏寺北年五十二子紳字仲縉博學能文洪武二十九年走雲南求父遺骸不得述滇南勸哭記建文元年四月紳上言父死節狀下翰林議贈翰林院學士奉議大夫謚文節正統六年又贈翰林學士謚忠文

呂文燧

呂文燧字用明永康人元至正之季民反處州爲盜轉掠而東陷永康婺諸縣繹騷弗寧文燧散家財數千萬與弟文燁合謀募里壯強子弟得三千人將之與盜屢戰盜敗走復其邑斬獲甚衆呂氏之聲聞東南朝廷三授以官皆辭不受用事者聽讒殺其弟卒不敢怒而爲之盡力大臣義之承制表其閭而復其家婺之巨室細民幸不遇盜者悉歸功呂氏是時永康有呂氏隱若巨鎮焉 太祖旣克婺乃藉兵甲詣轅門降 上大喜特命爲左副元帥兼知縣事時文



燧以事留杭未返命其弟文烜攝之比還復召爲庸  
田司經歷改中書省管勾江西行省都事權知廬州  
府至官三月浙西平更授嘉興知府松江民作亂襲  
嘉興覘知之走使者告李曹公文燧始據城曹公  
兵卽至遂就擒諸將欲屠城文燧等曰據城者賊也  
城中民何罪釋不屠民德之滿三載入朝奉詔持節  
諭閩婆國洪武三年十一月次興化有疾卒于驛舍  
年五十四鄉人聞其卒皆哭泣相弔喪歸髦倪迎拜  
於道數十里不絕卒之明年嘉興佐貳以下坐鹽法  
死者數千人有司以嘗署名公牘例籍其家 上特

詔歸之曰吾知呂文燧誠信人必不圖姦利且歿於使事可念也時呂氏家遠繫縣獄鄉人哀之如親戚及詔歸其家乃皆舉手相賀

徐原

徐原字均善蘭溪人也少從吳禮部遊與吳沉童梓爲友博覽羣書以詩文名世著有五經講義強學齋文集數卷 太祖取婺州與吳沉同命爲訓導歷主福建江西考試攷之皇明政要及元綱目云太祖改婺州爲寧越府命知府王宗顯開郡學延儒士萊儀宋濂爲五經師戴良爲學正吳沉徐原爲訓導時

喪亂之餘學校久廢至是始聞弦誦之聲按徐公原  
爲國初聘臣兩主試事官雖不顯而文學不在吳沉  
後政要綱目俱稱其有功學校焉

諸葛伯衡

諸葛伯衡蘭溪人也少清介持名節從鄉先生游獲  
聞前輩緒論力求實踐鄉里咸推重之洪武初以薦  
授北平雜造局大使不以家累自隨出入無車馬遇  
雨輒草履行泥塗中弗厭也遷趙州吏目州有建峯  
廟廟有青蛇惑人凡入人家必有禍伯衡殺青蛇罪  
巫者民以不惑以左春坊大學士董倫薦召問治道

謂以聖明之世紀綱正而法度脩民皆安業但廉  
之道輕耳上大悅擢陝西叅議以道途遠近定轉輸  
法民甚便之後改廣東叅議卒于官金華杜桓爲作  
小傳稱爲清脩直亮之士

許存仁

許存仁名元以字行浙之金華人祖謙學於金履祥  
得朱子傳學者稱白雲先生元末 高皇幸金華訪  
求其後召存仁未至而乘輿已還乃驛赴京師一見  
與語大說曰何相見之晚也拜京學教授仍命入傳  
皇太子及諸王歲乙巳九月丙辰朔置國子學設博

士助教學正學錄典書典膳等官以存仁爲博士丙午五月 上發濠梁省陵墓命從行八月壬子命存仁進講經史存仁講尚書洪範至休徵咎徵之應

上曰天道微妙難知人事感通易見天人一理必以類應今宜體此下修人事上合天道然豈特爲人上者當勉哉爲人臣者亦當脩省以輔其君上下交修格天之本也吳元年四月 上至白虎殿見諸子有讀孟子者問曰孟子何說爲要對曰勸國君以王道施仁政省刑薄稅乃其要也 上曰孟子專言仁義使當時有一賢君能用其言天下豈不定于一乎冬

十月丙子定國子學官制陞存仁爲祭酒最見禮遇  
出入兩宮且垂十年自稽古禮文之事至於人材進  
退時政弛張無不預議及修舉廢墜更規設法以教  
國子條例數十事皆見施行會存仁嘗以學宮什器  
用諸私室言官以移用官物坐之章入 上覽之笑  
而已適浙江僉事程孔昭劾奏存仁駐杭娶妾飾牀  
以象牙非師臣體乃詔勿治安置韶州旣至韶卽張  
文獻公祠以居好事者繪爲南華謫居圖後遇赦還  
卒

朱廉

朱廉字伯清義烏人也自少刻苦勵志淹貫經傳悉  
領要義既而學文于黃潛遂以文章知名國初知府  
王宗顯器其材辟爲羣學師及浙東行省右丞李曹  
公文忠開鎮嚴州尤加禮敬遂移長釣臺書院未幾  
丁外艱洪武三年詔修元史 聖朝日曆起爲纂脩  
官史成拜翰林編脩八年乘輿巡幸中都命廉扈  
駕至滁州北至中都進詩十首 上覽而大喜曰佳

詩朕爲汝和有頃召廉賜和詩六首當時以爲榮既  
而授經楚府尋陞長史久之病贖遂致仕而歸躬經  
講誦探研聖學嘗取朱熹語類摘其精義名曰理

纂言其爲文謹嚴精密有文集一十七卷

傅藻

傅藻字伯長義烏人也受業黃濟以文章知名洪武五年由本縣儒學召對稱旨授翰林編修尋改應奉文字拜監察御史擢東宮文字出知武昌府陞河南按察使所至皆著聲稱藻奉勅按鳳陽獄道途所見輒成紀行詩若干卷率有關於風教一日召對華蓋殿以詩呈進上覽之悅作和章四首賜之

朱文

朱文字悅道浙之義烏人也從王禕游學博才瞻剛



方少許可人洪武六年舉明經授知星子縣廉介自持興學勸農奏其縣山高風冷春意來遲艱于採茶上可其奏遂罷茶貢人惠之後陞贛州府同知盡心撫綏秩滿民遮擁留至今贛民祠祀之

張孟兼

張孟兼浦江人爲人伉爽不羈其文每爲誠意伯劉基所愛重數稱其才于上嘗召視之曰生骨相薄仕宦徐徐進乃可耳母驟也未幾除山東僉事廉勁疾惡摘發無所貸吏民見其行部皆凜然墮膽陞副使時布政吳以僧獲顯秩每加陵侮上怒論棄市

葉儀

葉儀字景翰金華人也受學于白雲許公公語以學者必以五倫爲本以開明心術變化氣質爲先儀朝夕惕勵研究奧旨已而授徒講學士爭趨焉其語學者曰聖賢言行盡于六經四書其微辭奧義則近世先儒之說備矣由其言以求其心涵泳從容久自得之不可先立己意而妄有是非也王師下金華召儀爲五經師以老疾辭隱居養親所著書曰南陽雜葉等集吳沉稱其理明識精一介不苟安貧樂道死而不變

范祖幹

范祖幹字景先金華人也授業許白雲之門悉得其旨趣其學以誠意爲主而嚴之以慎獨持守之功引誘學者惓惓真切惟恐其不入于善四方士夫嘗問安否爲斯文重輕戊戌天兵下婺與葉儀以大學進尋辟爲諮議以親老辭李文忠時守嚴郡特加敬禮恒稱師而不字幹篤孝郡守王宗顯立純孝坊以表之學者稱爲純孝先生所著有羣經指要讀詩記大學中庸發微栢軒集若干卷藏于家

馬廉

馬廉字原清東陽縣人幼有操志博通經史洪武初  
薦授德清丞招徠流離撫綏凋瘵甚得民心旣而調  
丞壽陽有候卒于廢寺得埋金五十兩以進廉命簿  
錄其數藏于官帑後歷遷山西按察司副使在官讞  
獄詳明民無冤滯以親老請謝政詔進一階致仕卒  
鄉人爲傳其事私謚曰孝廉

唐懷德

唐懷德字思誠金華人仲友七世孫性敏好學受業  
許謙六經百家之言無不研究其學以濂洛爲宗粹  
然一出于正廉訪副使暢篤聘講淮陰聞者傾服武

威余闕持節海右特傾下之或請闕書楊雄九州箴  
未知所出懷德即援筆寫之不遺一字嘗與宋濂宿  
錢塘辨諸子是非凡九十餘種歷誦其文以對如撞  
巨鍾隨應濂推其博思誠曰徒博陸澄之書厨耳吾  
則藉之以窮理而施諸事也用部使者薦擢金華縣  
學教諭遷衢州學錄卒所著有破萬總錄六經問答  
鈎玄集書學指南存齋稿百有餘卷

李 畢

李畢字宗表其先汴人元季徙家錢塘少從永康鄭  
僖游僖奇其才以女妻之避兵金華翱翔永康東陽

二邑間國初有司舉奏補國子監助教未幾以病免歸卜築永康奎山下講學授徒與諸詩人唱酬爲樂略不以貧窶介意其詩一出李杜二家機軸天台徐一夔稱其緣情指事機動籟鳴無窮搜苦索之態而語皆天成有盛唐家法識者以爲確論門人唐仲暹編其詩文爲草閣集凡七卷子轅字公載亦能詩嘗被薦爲宜倫縣丞所著有筠谷集

蘇友龍

蘇友龍字伯夔金華人遲之後嘗學經于許謙以才推充府吏入閩海爲差奏汀寇謀襲臨漳遣友龍督

長吏爲備長吏欲藉民爲兵友龍曰民不知兵久矣  
一旦藉之必大致紛紜此非禦盜是增盜也長吏問  
計將安出友龍曰吾知所處矣閱兵籍得放逸者二  
千使帥之擊賊竟獲其首禍者再轉江浙行省吏書  
紅巾犯杭州官吏多逃惟叅政樊執敬坐堂上以死  
自誓友龍說曰明公以身死國義則得矣如一城生  
聚何今城中衆不下數十萬公庫金帛以萬計與其  
委諸盜曷若募民使戰耶戰而不勝就死未晚樊不  
能從上馬迎敵而死友龍與椽李樞謀以蘇李署號  
召民殺賊一人卽携首受錢一百五十緡民持刀爭

奮數日之間獻馘充庭未幾辨章兵至破賊走之友龍絕口不言滿考謁選擢授蕭山尹縣爲吳越要衝師旅經從無虛月誅索芟芻不少愜意則侵掠居民友龍儲峙旣充有犯者擒置于法士卒入城如見大將不敢出語相誰何會歲儉弛湘湖之禁以利民不足啓常平倉以賑餓者僚屬力沮之友龍大言曰啓天子粟活天子民有何不可倘有譴責吾自任之民賴以生者蓋數萬計改本路總管府經歷未任轉行樞密院照磨陞行省都事叅政石林宜孫分省處州請友龍與俱友龍勸其禮賢下士安輯流亡招徠羣



盜撫之以恩衆心翕然處多盜征行吏多受盜金既降而復叛友龍秋毫無所犯已而浙東悉入 皇明版圖而七閩猶未附怨家告友龍長子仕閩坐徒淞陽遇赦還卒于家

鄭淵

鄭淵字仲涵浦江人也德璋曾孫祖文轟父鉅淵性孝母疾侍湯藥年餘弗離病革思食西瓜既食而卒後見瓜輒泣終身不忍食之因念母得贖疾繼喪父哀毀骨立服除猶哀慟遇忌日哭猶如初喪歿身不變從學宋濂以古文知名于時所著有遂初稿讀文

類及卒宋太史表其墓曰貞孝處士

吳沉

吳沉字濬仲浙江金華人故元國子博士師道子也博學有文累徵爲縣庠訓導辭不就洪武十二年薦授待制十一月甲午朔日 上觀漢紀顧謂沉曰人君理財之道視國如家可也一家之內父子不異貲其父經營儲蓄未有不爲子計者父子而異貲家必墮矣君民猶父子也若損民以益君民衣食不給而君獨富豈有是理哉丁酉 上論持身保業之道又謂沉曰人當無所不謹事雖微而必慮行雖小而必

防謹小行而無已者可以成大善忽細事而不戒者必至於成大惡常人且然況人君乎又曰安生於危危生於安安不克慮則能致危危而克慮則能致安在能謹與否爾 上御奉天門視朝畢謂沉曰人君治天下進賢納諫二者真切事也沉曰求之於古行者鮮矣是故亂日常多治日常少 上曰使其真知賢者與治其國何有不好真知諫者在於忠已何有不納惟其知之不真是以於已難入若誠能好賢則不待招揀而賢者自至誠能納諫則不待旌賞而諫者必來沉曰 陛下之言及此國家何幸焉十二年

十二月以事降編修十三年六月丁卯復以爲待制  
沉薦教授童冀儒士吳慎遣使徵之十四年冬十月  
辛酉給事中鄭相奏言尊無二上稱臣於東宮是並  
所尊矣沉駁之曰東宮國之大本所以繼聖體承天  
位者也臣等尊敬之禮胡得而異焉請凡啓事東宮  
如舊制 上從之十五年十一月以爲東閣大學士  
十六年二月 上將享太廟沉進精誠錄先是 上  
謂沉曰朕閱古昔聖賢其垂訓立教大要有三曰敬  
天曰忠君曰孝親君能敬天臣能忠君子能孝親則  
人道立矣然其言散在經傳未易會其要領爾等共

以三事以類編輯至是書成 上覽而善之命沉攬

序三月沉因講周書至國則罔有立政用儉人 上

曰甚矣國家不可有小人 有小人必敗君子故唐虞

任禹稷必去四凶魯用仲尼必誅正卯沉進曰書言

去邪勿疑所以深致其戒 上曰國家不幸有小人

如蓄毒藥不急去之必爲身患小人巧於悅上忍於

賊下人君若喜其順已而恣其所爲將無所不至矣

沉曰小人中懷奸邪而言似忠信不可不察 上曰

然小人善於逢迎彼知人主所樂爲者不顧非義乃

牽合附會曰是不可不爲人主不樂爲者不顧有益

於國家亦牽合附會曰是不必爲此誠國之賊也自古知人固難而知言亦不易八月丙戌以進講後期降侍書尋改博士十九年七月丁丑卒沉富蓄遠覽常因奏對誤遷渭源教諭未行改典籍陟大學士考功監劾其怠事降侍讀終博士三仕三已無喜愠人以此多之

鄭 濂

鄭濂字仲德浦江人也淵之從弟性寬默喜怒不形人稱長者主家政二十年子孫從化諸婦寡必守節一家同居歷宋元至洪武十四年有以寄鈔事証其

家者從弟湜代詣吏濂謂曰我家長當罪于是兄弟爭就獄事聞 太祖慰諭之因問以治家長久之道濂以謹守家規對 上嘉賜酒饌遂命除湜福建布政司叅政後復有盜糧証其家者 太祖曰鄭氏義門焉作此事後濂以事坐死弟洧就吏死于京人哀之私謚曰貞義處士

鄭 濟

鄭濟浦江人也濂之弟善屬文洪武二十六年尚書嚴震具其家孝友積行聞 上遣官簡拔其家子弟三十以上者二十四人赴京選用遂除濟爲奉議大

夫左春坊左庶子致仕卒于家

鄭沂

鄭沂字仲與浦江縣人宋時旌表義門之裔國初天  
兵下浙東甫定金華選良家子弟爲叅隨舍人沂居  
行間著能聲旣而還京師仍命歸鄉里洪武二十五  
年宣召義門子弟年三十以上者至御前選擢備用  
沂其一焉三十年又徵取大姓賢能者授以重任吏  
部引奏 上特召沂詣前語曰爾家大孝大義累世  
同居前朝雖嘗仕宦我今使汝大貴御筆親除爲禮  
部尙書夙夜祇畏恪恭乃職同寅協和有如兄弟於



時新創大理寺命各部官會同審囚沂再三詳讞無  
一人枉濫三十一年正月郊祭前期命焚諮城隍時  
天大雨禮畢雨忽止夜半登壇月明星朗大禮慶成  
天顏喜甚未幾奉旨往山西祭晉恭王五月還朝

太祖疾大漸旣而賓天典祭禮畢卽引年致仕東歸  
永樂二年 成祖思念舊臣復召沂授以前職蒞事  
三月憫其力衰不煩以政特製誥命賜歸有世惇孝  
友天稟忠淳之語四年朝廷新禮樂修永樂大典訪  
求天下圖書與姪監察御史幹以家藏書籍及龍吟  
雅友二琴上進蒙賜白金百兩寶鈔一千二百錠文

綺四端有副四年入朝賜白金五十兩寶鈔四百錠  
文綺二端有副皆異數也六年鄉人誣告義門私造  
軍器朝廷遣官搜索一無所有止有舊紅漆器尚存  
以罪坐家長瀾當之沂詣前請曰家長乃某之兄昏  
耄無聞某嘗爲禮官不能使家衆遵國法罪坐某兄  
弟爭再三事聞於朝未幾蒙恩宥仍賜冠帶還家八  
年 大駕巡北京召致仕老臣南京聚會同館待以  
優禮五日一朝東宮沂嘗爲領袖 駕還賜燕東歸  
十年三月忽得氣疾浹旬一日呼二子杓槃來前曰  
吾仰賴 天子寵光祖宗德澤白衣授以尙書今年

踰七十以疾終於正寢幸莫大焉爾等當一心向公  
力行義事以圖報効言畢忽風雨大作頃焉風靜雨  
止倏然而逝享年七十有五

鄭湜

鄭湜字仲持金華人洪武十四年好人誣告其家以  
交通賊臣事甚危兄弟二十五人存者幾二十人而  
五人爲湜之兄仲兄濂先以事在京師吏逮捕急四  
兄欲行湜奮曰有弟在其忍使兄陷刑辟自詣吏請  
行至京兄濂迎謂曰吾家長當任其罪弟無與湜曰  
兄年耄弟當任其罪二人相爭入獄旣而太祖聞

之召二人至殿前勞勉之卽赦其罪賜湯沐酒食詔拜湜福建布政司叅政吏部奏無缺特設叅議之官以處之遂授中順大夫福建布政司左叅議賜冠帶襲衣復命舉所知因薦同郡王應等五人後皆授叅議有聞于時湜治福建吏民熟其家聲相誠勿犯豪將病民者與之爭可否帖帖畏服南靜縣民爲亂註誤者數千百人部曲多掠其婦女爲奴皆言于諸將縱遣去卒不敢譁商有二人劇盜殺其一而取其財其一人得脫訴于官捕盜在獄驗屍無有不肯承夜取盜鞫訊因縛置于庭匿吏案下俾聽其語夜半盜

顧庭空無人果私語始知其沈屍井中明日詰盜以沈屍處盜驚伏聞人神其政十五年正月以疾卒于京師享年五十有六

鄭棠

鄭棠字叔美浦江人也與從父兄楷弟栢俱受業宋濂之門以文詞知名棠尤善馳騁永樂初纂脩大典用禮部尚書李至剛薦入館書成吏部銓試第一除翰林院典籍仁宗爲太子監國南京選儒臣進講與主汝玉等九人在選敷陳從容眷待殊渥秩滿陞翰林檢討以疾辭歸所著有金史評及道山集二十

卷

鄭楷

鄭楷字叔度浦江人也蜀王聞其賢奏除王府教授  
賜號醇翁陞長史致仕所著有鳳鳴集

李希明

李希明字濬文東陽人父唐從許謙游潛心經史爲  
詩文必以理勝一時名輩如胡翰宋濂雅相推重之  
爲本郡儒學教授所著有靜學齋尚綱齋集希明夙  
承廷訓多所淹通洪武中舉孝廉入太學舍選第一  
授伴讀侍 太宗于潛邸從容輔導甚被禮遇陞監

察御史進江西左叅政時陳友諒餘黨依險縱掠朝廷將出師勦之希明奏乞矜其勢窘不得已者招撫不服與師未晚從之希明榜示流民爭先來歸乃以安撫功擢刑部侍郎卒于官

### 何士英

何士英字子文東陽縣人洪武中舉人才授知平原府以親老乞歸忤旨謫廉州判官臨民廉謹再乞歸養永樂初起知平原府編氓相慶以爲重得慈父母會主者較郡庾虧數千石士英方自劾民爭輸之如數考滿去父老遮畱載道安府有詩送行有前任只

多琴與鶴此行惟有影和身之句御屏記廉吏十八  
人士英居其首陞兩淮鹽運使先是民苦部差督鹽  
課者所至苛擾及歲課孳生馬駒賠納不及士英一  
切奏罷之遭母喪歸吏部尚書蹇義以其廉能奏欲  
奪情鑒辭終制起復蒞前職始終一節致仕歸卒

### 吳履

吳履字德基浙江蘭谿人國初爲南康丞南康俗悍  
民以爲丞儒者易之履晏然自如居數月周知其情  
僞有發擿一縣驚服乃更化以寬視民如子民有訴  
召使與前語弗加叱民或援丞裾相爾汝弗責也有



徵調召大姓坐廡下好言慰諭之聽人人自言便否由是民愛丞如父吏卒不能爲姦有王瓊輝仇里豪羅玉成執其家人笞辱之玉成兄子玉汝不勝悲集少年千餘人圍瓊輝家奪之歸縛瓊輝道箠之濱死乃釋去瓊輝兄弟五人庭訴辭指出血誓與羅氏俱死履念獄成當連千餘人勢不便乃召瓊輝語之曰獨羅氏圍爾家耶對曰千餘人曰千餘人皆辱爾耶曰數人耳曰汝憾數人而累千餘人可乎且衆怒不可犯儻不顧死盡殺爾家而就逮雖有司有法汝悔當何及瓊輝悟頓首惟命履乃捕操箠者四人于瓊

前杖數十血流至踵命羅氏對瓊輝引罪拜之事  
遂解縣令至召民轉輸不時躬至鄉督之民走入山  
罵令吏卒以語動令令怒欲逮論一鄉民獲六七人  
下獄嚴錮之而往捕其餘民大駭履計民無罪出巡  
獄叱獄卒釋之曰若無罪還告若父兄無恐乃往告  
令曰犯使君者一匹夫耳其鄉人何罪且法乃天  
子法豈使君解怒具乎儻急且有變自古未有窮刑  
法逮衆而不變者也事得已南康俗好祀淫祠祠有  
蛇出戶限民驚怪以爲神至奔走祠之履罪神巫十  
人投其主江中爲丞六年而去去三月他吏用法急

而亂民益追思之知安化縣始土豪以世亂糾民爲兵天下既定豪酋易氏者怙勇力與所部保險阻自全江陰侯吳良檄劾縣兵捕擊之兵且集召令計事履曰易氏自逃死無他惡奈何激之使生變乎不若先以計致之果爲逆用兵未晚也良聽之而事平已而江陰侯檄取故兵請爲農者民自驚奔相告勢危甚履屬耆老諭之曰侯所取者兵民無與也籍其願爲兵者數人而止長沙郡令造戎衣履力爭曰吾邑民貧而俗暴撫之以恩且恐叛安可責以事如他縣乎令格不奉命其罪小奉命而致亂其禍大決不敢

辭小罪而陷大罪也郡從之凡有徵徭皆不使之與  
越三載入朝擢知濰州濰州民畜官驢四十匹萊守  
核其孳息駒欲責償諸縣皆以勒民買驢洵矣履  
不聽曰民實不欺烏可妄責其償國家富極海內爲  
吏者當宣布德澤爲民除疾苦寧少數匹驢耶于是  
事得罷山東民願以牛羊代稅吏聽之履曰牛羊後  
有死瘠患不如粟也獨收民粟他縣以牛羊送陝西  
驅走二千里皆破家以償濰獨完役僉人部送隣縣  
牛履曰有牛家送牛雖勞不敢怨使之代之脫中道  
牛死誰當爲償力爭不奉命履爲吏不求威名以愛

利爲先重刑獄凡有訟召受訟者面質之平其怒而  
止不忍置民於獄獄常空有追需不務速辦稍緩其  
期約故物價不踴視他所費恒減十二三所至民感  
之以爲愛已居濰二年會改濰爲縣召還遂謝事歸  
將行辭其友翰林學士宋濂濂與履交戲謂之曰若  
願受長者教乎履曰公何以命之濂曰天子官汝  
以五品秩乞骸骨歸恩甚大汝知保之之道乎履謝  
曰願卒教之濂曰慎毋出門戶絕世吏勿與交履至  
家如濂戒竟以自全

劉辰

劉辰字伯靜金華縣人慷慨負氣節善談論喜功名  
天兵下婺城辰首上謁署爲典籤奉使方谷珍令左  
右飾二美姬以進辰峻却之左丞李文忠開省于嚴  
辟辰叅其軍事大將葛俊守廣信當祈寒集丁夫浚  
城濠民苦之將爲變文正止之不從大怒欲臨之以  
兵辰請往諭以大義後悔聽命事遂解以親老求歸  
養未几父母繼歿執喪哀毀薦起爲監察御史立朝  
持正蹇諤著稱擢知鎮江府興廢舉墜勤于其政郡  
有濱江田八十餘頃歲久淪沒仍責賦于民爲請于  
朝除之京口開廢舟楫不通漕運者轉新河江陰二

港以出江多阻風濤乃自京口至呂城百二十里濬  
淤塞修閘壩順水勢之出入公私便之漕河源淺易  
涸恒仰練湖以益水湖有三斗門久廢亦修築之干  
是漕舟既通而湖下之田亦稔浙人轉漕道其境上  
死者收瘞病者給米以小舟送境賴全活者甚衆  
丹陽道接句容民負任者往往因日暮行劫商旅患  
之辰嚴爲禁約盜遂息永樂元年召修高廟實錄凡  
當時戰伐克捷之功宿將舊臣有所不能盡者歷歷  
言之聽者如身在其時目睹其事考之記注無不懸  
合書成超拜江西布政司左叅政雨滂江溢饑民爲

益富室多罹其患檄郡邑勸富民出粟以貸饑者官  
爲立券期以來年償本蠲其役以爲之息民遂相安  
無事南贛諸府荒田糧六萬餘石有司歲抑取于民  
民不堪其弊辰以聞悉蠲其額後坐同官累免歸六  
年召起爲北京刑部左侍郎以老不任政日被顧問  
留京師者三年賜勅致仕踰年復召至京命督工武  
當未行疾作給驛送還卒于常州毗陵驛舍年七十  
八爲人直諒多聞有古節士風所著有國初事蹟子  
徵博覽能文年餘七十猶力學不懈嘗著金華名賢

傳



張壽祖

張壽祖字伯樛浦江人也性孝父早喪母患乳核荏苒二十年成癰忽潰壽祖吮出其毒而病隨愈年九十餘寢疾累歲壽祖侍奉不懈母卒哀毀骨立貧不外慕授徒爲業洪武二十五年以老召歷事戶曹除光化知縣

胡翰

胡翰字仲申金華人自幼聰睿一日道中拾鏹若干緡不去坐候遺者而還焉父奇之益督以學遊學浦陽博覽經史又登許文懿公門南北士皆願與交以

所著文進之文獻黃公待制柳公皆稱許不容口有  
勸之仕輒辭過廣川吊董生謁曲阜拜孔子墓而歸  
當世名公多所交接惟武威余公闕宣城貢公師泰  
號知己遭時多虞四方兵起避地南華山中著書自  
樂 高皇帝聘至金陵會有以金華民籍田出兵者  
翰曰金華民素懦不習軍旅藉以爲兵徒費廩粟爾  
上可其奏授衢州教授洪武乙酉奉旨纂脩元史賜  
白金文幣以歸素嗜山水泉石晚歲卜居三洞之上  
幅巾短杖徜徉終日焉所著有春秋集義胡仲子集  
長山先生集吳沉稱其文簡潔清峻高出于人暮年

請文者踵門不苟隨也

汪仁壽

汪仁壽字仲山蘭谿縣人善記覽經史百氏靡不窮究尤明于性理之說天兵下婺同許元葉瓚玉胡翰等召見會食省中日令二人進講經史敷陳治道所著有靜齋稿若干卷子雨能繼家學詩詞俊雅與呂肅陳誠汪旻爲文字交人稱四友

汪與立

汪與立字師道蘭谿縣人受業于范祖幹其德行與何壽朋齊名而文學稍優嘗謂學者當視古人爲不

是母視今人爲有餘人以爲名言隱居教授不求聞  
達優游林泉以壽終

### 盛本源

盛本源蘭谿縣人也洪武中兄本道被鄉里誣誤罪  
當死本源謂其兄曰兄未有嗣理不可死我子女四  
人愿以身代兄在我猶不死也遂毅然就吏代死聞  
者莫不嘆異杜長史桓嘗爲作傳

### 何壽朋

何壽朋字德齡蘭溪縣人也受學于葉儀窮理守道  
隱居教授不妄干人洪武初舉孝廉以二親俱老辭

父歿舍所居宅易地葬焉學者因其自號歸全稱曰歸全先生

董仁仲

董仁仲蘭谿縣人也洪武中知莆田縣蒞政精勤而持之以公毫無所徇公庭鞭朴雖設不施民大悅服後卒于官貧不能歸葬民相與營葬于邑之西劉山

朱肇

朱肇字本初義烏人洪武中領鄉薦入太學召對稱旨授戶科給事中永樂初奉命按治江西黜貪去弊政若神明立朝敢言嘗以論事忤都御史陳瑛中以

他事當坐死得白左遷湖廣宣慰司教授用知府唐  
薦陞長沙府同知政化大行宣德初罷歸

楊芾

楊芾字仲彰義烏人徙居東陽少穎悟刻志于學早  
從陳樵遊復登黃潛之門文詞典雅操筆立就二公  
皆愛重焉洪武初聘爲義烏學官膺薦上京辭歸所  
著詩文有百一藁無逸齋稿又輯元詩爲正聲類編  
總若干卷學者稱鶴岩先生子璵璥俱能詩璥嘗補  
金華賢達傳

樓璉

樓璉字士連義烏人祖有成字玉汝以字學著吳萊稱其精緻可傳任無爲路學錄父光亨字景元從吳萊學宋濂序其梅溪詩藁稱爲法度之詩璉蚤承庭訓復從宋濂游經學淵邃文章峻潔爲同門所推洪武中由儒士召授宣寧主簿歷仁壽大冶陞藍田知縣轉廣東道監察御史以事謫戍雲南有居夷集五卷用薦召陞翰林侍讀靖難師入京命方孝孺草詔加以極刑改命璉爲之璉不得已受命歸而憤嘆妻子問得無傷方先生耶璉乃自經死

王紳

王紳字仲縉義烏人學士禕之子幼孤鞠于兄綬聰  
明好學克成家從學宋濂濂教爲文章卽能馳騁變  
化議論鑿鑿出入人表濂器之曰吾友王侍制其有  
後乎紳事母盡孝及卒哀毀踰禮未幾綬亦歿孺然  
單居蜀王聞其名聘至藩府待以賓禮紳念父禕持  
節死雲南遠在萬里外乃請于 王乞往求遺骸王  
憫而資其行旣至訪求不獲遂于死所立木主號慟  
奠祭聞者泣下有滇南慟哭記以著志旣還王禮遇  
之益至未幾以文行薦于 朝召爲國子博士橫經  
講解六館翕然俄得疾卒于官年四十有一所著有



本朝分省人物志 卷五十二  
繼志齋文集三十卷行于世

金信

金信字中孚蘭谿縣人穎悟工詩從楊維禎遊往來吳越間詩聲大著部使者以茂才舉不應歸隱金華之優游洞以詩自娛學者稱爲謾吟先生有春草軒集傳于世子聲字伯鏞亦能詩與袁仲仁陳大有輩皆以風流儒雅能詩聞于時號十才子云

鄭栢

鄭栢字叔瑞浦江人也隱居著書或以其名達之蜀王王顧其兄楷曰叔瑞可謂清逸之士人以清逸處

三稱之所著有聖朝文纂文章正宗續文章正宗金華賢達傳進德齋稿

鄭欽

鄭欽字子敬浦江人也太和弟文厚子太和無子立爲後孝友天至年十七生父得羸疾醫言人血可治輒刺膚血以和藥旣沒痛悼終身母疾凡三焚頂灼臂以顛天撫弟妹極盡恩意視一家如一身資婚嫁有家禮其遇疎族有續食粟禦寒衾恤異姓周窮饋嘗續完太和所著家規共七十三則自號青蓮居士

云

龔泰

龔泰字叔安義烏人也九歲而孤母傅氏躬教之長就外傳日記數千言博達世故每長老有所資問必爲之條析動中肯綮洪武丙子領鄉薦明年入太學奉旨閱齊王府衛兵伍綜畫周密策試第一除戶科試給事中辛巳遷都給事壬午北兵渡江有旨令泰巡城泰與其妻訣曰國事至此不可爲矣卽城且陷吾分必死爾第齎勅携諸幼以歸否則俱溺于井辱可免也火起內廷泰馳赴之道爲兵校所執見上于金川門命非奸籍者釋之泰亦獲釋竟投城以

死妻負其遺骸歸葬鄉里泰遇事剛果有爲以孝友著聞始居邑庠遇狂者至擠泰于池幾溺弗救或請訟之官泰曰彼誠病狂於吾何校鄉人趙文慶者爲盜所竊跡之弗得有謂巫言其應如響叩之當得其實願泰俱往及往巫見泰瞠不能出一語由是服泰之正死時年三十六士大夫莫不悲之

### 戴元禮

戴元禮名思恭以字行金華人學於丹溪朱彥修初仕御醫事 太祖藥餌輒效風雨卽免元禮朝洪武三十一年五月 上病少間輦出御右順門召諸醫

官治疾無狀者盡付獄獨召元禮至榻前曰汝仁義  
人也事無預汝無恐太孫卽位誅諸侍醫者獨拜元  
禮太醫院使遼簡王肅莊王慶靖王皆奔喪至京聞  
太孫道 太祖語哭問勞元禮簡王題仁義字大軸  
莊王靖王爲贊詠賜元禮或曰 文皇以舊恩陞元  
禮院使者誤也初洪武丙寅 文皇患瘕韓公懋治  
久不愈請元禮至問所用藥曰是也又問 文皇嗜  
何物曰生芹元禮曰得之矣投一劑夜暴下視之皆  
細蝗也晉恭王病亦請元禮得愈病已復發卒 太  
祖怒逮治王國諸臣元禮侍曰臣嘗奉命療王王飲

臣藥數矣臣對王病毒在膏盲卽復作不可治今果  
然太祖遂釋晉王諸臣尚書嚴震直病上令元  
禮好治之否且償命一劑而愈有妃嗜燒酒腹痛治  
之愈日十年必復發發不可治後十年竟病腹痛死  
王賓者吳中高士願受元禮方書元禮索賓拜師事  
我我與方書賓不肯一日詣元禮值他出有書八冊  
案上賓袖去元禮歸驚嘆自失賓不娶臨終以其書  
授盛啟東韓叔賜

貝泰

貝泰字忠魯金華縣人也自少以文行聞永樂初由

太學生中京闈鄉試授餘于縣學教諭遷國子助教  
尋陞司業超拜祭酒以文學受知 宣廟召見便殿  
賜 御製招隱歌前後在太學四十餘年六館之士  
翕然從化後致仕歸縣尹欲爲造大司成坊木石已  
具固謝却之尹不得已改爲縣儀門所著有文集若  
干卷

邢旭

邢旭字景賜金華縣人父沂從范祖幹游以詞翰知名與邢俛成濬俱嗜吟咏互相倡和號山中三詩友  
旭學于家庭登永樂二年進士累官河南叅政進

旱澇修舉荒政民賴以安奏免二程子孫徭役賜田  
土正統初陞四川布政革弊去奸撫養軍民恩威並  
著夷酋王永壽董敏失和治兵交攻朝廷遣帥討之  
旭卽身履其寨喻以禍福皆釋甲待罪請遣子入質  
進馬謝恩師遂不戰解還未幾致仕卒蜀人追思惠  
政立碑成都三公廟祀之所著有退省集

邵玘

邵玘字以先蘭谿縣人中永樂乙酉鄉試明年中會  
試賜勅歸進學又明年召至授湖廣道監察御史慨  
然以功業自期號貞白生以見志明憲紀究律意而



用法平恕至遇渠奸巨猾爲民厲者亦不少寬假聲譽遂起嘗巡按江西廣東福建克振風裁時 仁宗

皇帝監國尤所簡知間刑部都察院大理寺明闕堂上

官 命玘署有重獄數付以玘玘感 上知遇夙夜

盡心每事親理有所顧問應對詳明一時老成多推

讓之陞江西按察使先是南昌新建二縣苦上官和

買理役者供一日費家爲之空玘視事之日立罷之

權聲溢路而私不便者皆側目焉玘自用簡僉終亦

莫敢一語積歲訟牒填委悉取省閱擇其尤甚者自

聽斷餘悉歸郡縣滯獄一清在江西五年政用肅然

丁內艱去服闋改福建按察使治職如江西而有司之務倍繁稍濟以寬宣德三年召爲南京都察院左副都御史時南京諸司緩弛御史尤縱玘奉勅簡擇奏黜其不肖及庸懦者綱紀復振爲人外肅內寬仕二十餘年所歷中外皆風憲于條制故實與夫施措之宜默識明習所至糾劾官邪舉大體而略瑣細家居有孝行旣仕得錄時惟母在迎奉就養極其愛敬母喪哀毀所居產瑞芝者再鄉里以爲孝感處朋友寮屬必約之於義有所薦舉必清介士其廉潔之操終始一轍宣德五年正月得風眩疾遽卒訃聞上

爲悼遣行人賜祭又命有司營葬事享年六十有五

謝忱

謝忱字惟壽永康人也貢入太學領應天鄉薦登永樂壬辰進士授監察御史遇事敢言不避權貴九爲巡按詰奸禁暴無所假借人稱謝閻王漢府謀不軌廉得其實以聞命勅之賜反屬男女吳德等四人因忤尚書蹇義陞四川按察司僉事歲歉民多抵法忱憫之爲求可生之途適地方多虎患示以得虎皮三者免一命人爭捕之于是虎患息而民命以全卒于言歸葬之日行李蕭然

陳俊

陳俊字俊民東陽縣人登永樂乙未進士除監察御史巡撫南畿劾貪吏革宿弊郡邑肅然累陞應天府尹以嚴峻繩下吏有犯賊者或杖殺之處同僚不阿以私嘗曰吾不能自立清流然隨波汨泥亦不爲也後卒于官飲食之明日俱甦詢之乃寧波追賊軍艘遭風飄溺南海耳遂移文遣之陞陝西副使以疾乞歸

包珣

包珣字懷德以字行蘭谿縣人永樂丁酉舉浙江鄉

闡卒業成均居無何拜雲南道監察御史直言正色  
侃侃立朝理獄必求其情人稱其無冤其存心尤仁  
厚友人爲京秩妻死無子止一女方訛適珣使外其  
友病篤念珣不置口遂遺囑置衣篋中戒僕曰此篋  
必侯包公至發之珣拜見其書大慟且知有托孤意  
乃極力營其喪葬育教其女踰已出及筭擇同里宦  
族子歸之同官一人逮獄危急密以黃金百兩白金  
置薪束中見寄時無知者踰月其人死於狴犴  
珣邀其鄉之仕宦者併其孤焚香誓心出其物以付  
之封記如故無錙銖遺人服其不欺嘗巡歷遼東福

建江西廣東諸郡廉公明恕正己正人吏畏民懷所  
至有聲宣德乙卯幾九載欽陞河南按察使斷獄平  
允人目爲龍圖後人嘗有驪麪工暮夜被刺莫知誰  
何有司誣執一人拷訊不服珣廉得其人竟服辜一  
藝人技頗精一日昧爽赴憲司執役道經陋巷被人  
中傷投井中汲者聞井中有呶嚶聲急告於珣珣曰  
此人必未死令人懸縵繫紙筆令書其人果血模糊  
書殺我者某某捕盜至則人死矣遂寘於法人益稱  
其神明又軫念客死及無葬者乃捐俸金置義塚方  
四十里凡枯骸遺骸咸令掩藏仍令屬邑一如之平

生力行陰德類此正統辛酉蒙恩驛召至京陞刑部左侍郎未幾謫雲中丁卯歲十二月以疾卒

盧 睿

盧睿字仲思東陽人永樂丁酉領浙江鄉薦辛丑登進士第宣德丙午拜監察御史丁內艱起復改山西道爲御史廉正明決不爲利害所惑有土豪被逮法當死主憲某公徇私傅生議睿執不可改讞釋之已而事敗釋者以鬻獄謫戍睿之名自是顯民有犯法全家徙戍遼其徙也有逸去者後得而繫之繫久遇恩宥主憲猶督發配所甚急睿曰已獲卽遣可也久

繫而遇宥可釋不可遣入疏辨之卒釋寧家嘗按治於遼囚有訴寃者十三人皆金州衛卒與卒長也自言訶知山東民運布花多奸弊因合謀執之弗克執反被誣以強盜獄成且二年矣察其實寃悉辯出之十三人者得不死一時令行禁止下人畏且服之正統丁巳朝廷以大同宣府俱宿重兵宜遴選憲臣巡撫特陞右僉都御史奉勅以行至則嚴法令剷蠹弊節浮費廣儲蓄摧強撫弱人賴以安時北虜入貢勢頗張睿慮其包藏禍心爲後患乃上疏言馭戎之道要在恩威相濟恩不施則無以懷遠武不振則無以



示威宜修武備防不虞識者韙之辛酉改命叅贊寧  
夏軍務寧夏孤懸境外尤爲重鎮贊畫戎機行視險  
要增築鳴沙州興武二城列置烽燧十餘所益廣屯  
種繕甲兵較士馬以固邊備而於軍民利病可施罷  
者尤盡心焉初授田屯軍不計腴瘠衆苦於輸稅瘠  
視瘠者求閒田益之因教以墾闢灌溉之法不數年  
田皆膏腴耕者利焉民被水災輒復具奏蠲租姦不  
得行軍無苛擾其地舊設儒學訓武生春秋二下恒  
斂衆錢以祭瘠謂其瀆且擾也因規田二十餘頃請  
於朝以軍餘佃之歲收租入爲常祀費凡區畫邊務

出於獨見者章數十上多見施行而與總戎會議而  
行者尤多理冤恤死與正人心關風化之事設誠而  
力行之在鎮年久上下悅焉嘗遭風痺疾 上聞驛

召至京賜醫藥俾養疾京邸丙寅春疾少瘥復起西  
行丁卯陞右副都御史己巳秋虜寇大同以有備故  
無患是冬賜金織文綺二表裏白金二十兩蓋寵勞  
之也至是疾復作屢疏乞骸骨庚午始得請南還時  
年六十一矣爲人天資淳美孝友忠厚入無間言居  
喪奉祭必修古禮而誠意懇惻終始無替其於修家  
譜置祭田凡義所當爲者必勇爲之至於聲色勞利

則不惟不趨且常避遠之若畏怯然居守三十餘年  
家無餘資其自奉雖儉薄而於待賓客濟貧困未嘗  
不豐且厚也家居十有三年乃卒距生七十有三

章聰

章聰字俊民金華縣人登永樂甲辰進士宣德二年  
拜監察御史彈劾不避權貴銓曹稱爲御史甲乙嘗  
奉勅撫諭南夷及監軍討罪西戎規畫得宜戎夷歸  
化朝廷嘉其能陞廣西按察使奏徙南丹衛于賓州  
奉議衛于貴縣士卒免煙瘴之患議置巡司于潯梧  
柳慶要害之地民免圍軍之擾陞右布政使尋丁內

外艱卒于家

王 稔

王稔字叔豐義烏人自幼潛心勉學博覽羣書侍父入蜀游學京師及父歿扶柩歸葬終喪復登方孝孺之門以卒所業文行重于士林及孝孺被刑狼籍人莫敢收稔與鄭恂潛至聚寶門外求其骸骨以歸禍幾不測人稱其誼永樂中以儒士舉預修郡邑志及採上二朝實錄事蹟以病曠不仕號曠樵所著有青岩類藁

李 敘

李敘字秉彝東陽縣人永樂中由鄉薦入太學最爲  
祭酒胡儼所器重宣德初試授監察御史嘗奉命錄  
囚辨出交趾俘囚凡三千餘人出巡海甸首擒豪右  
范端操等十餘人置之獄餘皆屏迹官吏有貪墨者  
一切汰去雖親戚故舊不少容接泗川有老嫗鬻子  
以供權貴烙馬敘會權貴出法語禁止之中使取珍  
禽異獸至淮者敘陳其害民悉報罷 上問都御史  
顧佐諸御史盡職者有幾佐首以敘對風裁凜凜朝  
野稱之凡巡按例皆歲一周交代敘獨保留淮上三  
年及還朝權貴構以事下獄必欲擠之會八百車里

二蕃讐殺累遣廷臣招撫不服朝議以爲惟敘可左  
遷行人領特旨往諭之至則曉以禍福逆順皆聽命  
息兵通貢 上喜復以爲御史竟爲諸權要所誣構  
謫戍大同天順改元赦還復職遂乞致仕歸優游林  
下凡二十年以高壽終所著有困菴集南征紀行錄  
藏于家

杜 桓

杜桓字宗表金華縣人領鄉薦以親老家居就養不  
赴春試博極羣書登永樂進士授紀善悉心輔導知  
無不言王禮遇之未嘗稱名後乞致仕桓學識醇正

制行剛方爲詩文典雅俊逸所著有尙儉齋文集

馮傑

馮傑字孟英金華縣人永樂中貢入太學時方營建  
考選管工授瀘州判官佐政廉平民夷從化正統中  
薦陞監察御史巡按福建奏減銀課巡兩淮奏寬鹽  
禁人多懷之景泰初廣東盜起州縣騷動朝論以傑  
歷練老成陞授按察使隨方撫捕未幾盜平致仕歸

潘璋

潘璋字栗夫金華縣人由進士任工部主事監稅荆  
南有水蘖聲陞四川提學僉事善干作興士類尤尊

禮儒先尚書周洪謨謂全蜀之士仰之若山斗愛之若父母陞陝西副使仍董學政未幾卒蜀祀名宦祠所著有靜虛齋稿

樓澤

樓澤字濟霖永康人登正統乙丑進士初授刑部主事正統十四年扈駕北征師潰于土木死之事與龔全安童存德包良佐同天順初查褒忠節因無子故卹典勿及云

宗社

宗社字濟才蘭谿縣人性至孝父疾竭力就養及歿



廬墓三年母陳目雙瞽社每旦出郭汲溪流爲母洗滌且以舌舐之目遂復明母後以壽終葬日陰雨幾不克葬社號泣呼天天忽朗霽禮成復雨人以爲孝感復廬墓三年天順中有司上其事詔旌其門曰孝行以國子生授知瀘州

姜璉

姜璉字廷器蘭谿縣人本姓徐氏其先有六一翁者瘞于姜冒姓焉連講學爲文度越流輩天順庚辰登進士授山東寧海州知州陞贛州守丁內艱改永平卒歷官通敏有治績嘗大書榜公堂云漕官事如家

事以民心爲己心足稱良吏所著有凝香稿喪禮書  
咏史詩藏于家

龔永吉

龔永吉字天民義烏人泰之子舉鄉薦授職方司主  
事陞武選郎中以事謫戍平涼時北虜犯邊用兵部  
尙書王驥薦爲佐軍從討破之尋詔驥南討麓川緬  
甸等處及征勦苗蠻養孟等處永吉從出師皆有勳  
績還陞大理少卿歷兵部右侍郎調南京禮部改大  
理寺卿決獄多平反成化改元上疏乞休歸七年卒  
于家朝廷遣官諭祭營葬